

**Naaja H. Nathanielsen  
Attaviitsoq**

UPA 2016/135  
28. april 2016

**Aalisarnek pillugu Inatsisartut Inatsisaat allanngorteqqullugu imaalillugu Kalaallit Nunaata kitaani raajanut TAC-ip agguanneqarnerani sinerissap qanittuani aalisartunut avataasiortunullu assigiimmik 50/50-ngortillugu suliareqqullugu Naalakkersuisut peqquneqarnissaannik Inatsisartut aalajangiiffigisassatut siunnersuut.**

(Inatsisartunut ilaasortaq Nikolaj Jeremiassen, Siumut)

Pisassiissutit sinerissap qanittuani aalisartut avataasiortullu akornanni agguataarnerat naalakkersuinikkut aalajangereruvoq. Taamaattumik raajanut TAC-mik agguataarineq soorunami periarfissaalluni, soorlu tamanna siunnersuutigineqartumit kissaatigineqartoq. Tamanna siusinnerusukkut isumaliutissiisuutaasarsimasuni inatsisartullu suleriaasaanni § 37 naapertorlugu apeqqutaasut naalakkersuisunit akissutaanni ersersinneqartareersimavoq.

Raajat eqqarsaatigigaanni, taakku nunanut allanut tunisassiornitsinni initoorujussuupput. Raajarniarnerup iluani sinaakutissanik allannguissagutta siunertaa ersarittariaqarpoq. Naalakkersuisooqatigiit arlaleriarlutik nalunaarutigisarpaat inuussutissarsiutigut ingerlatsinerup sinaakutaannut qulalersitsisoqassanngitsoq - taamaattumik uran pillugu taasisitsisoqassanngitsoq aamma aalajangertoqarpoq. Ernummatigineqarpormi soqutigisaqartunut inuussutissarsiummi aningaasaliisartunut patajaassuseqanngissutsimik takutitsinissaq. Taamaattumik TAC-mik allanngortitsinissap siunertaa ersarilluinnartumik oqaasertalersortariaqarpoq, sammisattalu iluani naalakkersuinikkut anguniakkanut tamakkiisunut ilanngunneqassalluni.

Siunnersuuteqartup kissatigaa sinerissap qanittuani raajarniartartut TAC-mit anginerusumik pissarsiaqartalissasut, Naalakkersuisullu nalunaarutigaat sinerissap qanittuani raajarniat pisassiissutigineqartunik pisaqarsinnaassuseqartut. Ilimagisariaqarparput agguariaatsimi allannguutissatut siunnersuut avataasiortuninngaanniit iluarisimaarneqarnaviannngitsoq - soorunami. Soqutigisatimmi illersortussaavaat. Tamannalu saqitsaanneq piareersimaffigissagutsigu, taava isumaqarpunga ersarissumik akisinnaasariaqartugut aalisarnerup sumut ineriartornissaanut qanoq kissaateqarnerluta. Tamassuma kingornatigut aalisarnermut inatsit oqaluttuaannaarpaluttoq ujartorpara. Oqaluttuaannaanerata assersuussinnaangortippaa soorlu Skotlandimi Loch Ness-imi uumasorujussuaq tusaamasaq. Kikkut tamarmik soqutiginartippaat oqaluuseralugulu, arlaannaataluunniilli takusimanngilaa.

Siunnersuut tapersernagulu itigartinngilara. Aalisarnermut ataatsimiititaliamut innersuuppara, isumaliutissiissutaannullu siunnersuutip ajunngequtaanik pitsaanngequtaanillu torersumik naliliiffigineqarnissaanik neriuffigisannik qilanaarlunga, taamaalillunimi kikkut tamarmik siunnersuutip kingunerisassaanik ilisimasaqalissapput.